

Vörugjald af vörum sem koma til hafnarinnar fellur í gjalddaga þegar skipið sem vörurnar flytur er komið í höfnina og vörugjald af vörum sem fluttar eru úr höfninni fellur í gjalddaga þegar vörurnar eru komnar á skip. Skipstjóra og afgreiðslumanni skips er óheimilt að afhenda vörurnar fyrir en gjaldið er greitt. Hafnarsjóður hefur haldsrétt í skráningar- og þjóðernisskírteinum skips til tryggingar gjaldinu. Aflagjald og vörugjald af útflutningi skal auk þess tryggt með veði í útflutningsbirgðum þess aðila er skuldar gjöldin.

18. gr.

Öll gjöld samkvæmt þessari reglugerð má taka fjárnámi. Skipagjöldin eru tryggð með lögveði í skipinu og gengur það veði í tvö ár fyrir samningsveðskuldum sbr. ákvæði 12. gr. hafnalaga.

IV. KAFLI

Frávik og gildistaka.

19. gr.

Ef sérstakar ástæður eru fyrir hendi getur ráðherra heimilað einstökum hafnarstjórnnum frávik frá gjaldskrá þessari.

Ef hafnarstjórn óskar frávika frá gjaldskrá þessari skal hún senda hafnaráði rökstudda beiðni þar að lútandi. Hafnaráð leggur síðan tillögur sínar fyrir ráðherra sem ákveður hvort frávik skuli leyfð.

20. gr.

Gjaldskrá þessi sem sett er samkvæmt hafnalögum nr. 23/1994 staðfestist hér með til að öðlast gildi frá og með 1. febrúar 1998, og birtist til eftirbreytni öllum þeim sem hlut eiga að máli. Jafnframt fellur úr gildi gjaldskrá fyrir hafnir nr. 147/1997.

Ákvæði til bráðabirgða

Hafi skip ekki alþjóðlegt mælibréf, sem gefið er út eftir ákvæðum alþjóðasamþykktarinnar um mælingu skipa frá 1969 er hafnarstjórn heimilt að miða gjöld samkvæmt gjaldskrá þessari við brúttórúmlestatölu skips. Þegar svo háttar skal lestagjald vera kr. 8,45 á mælieiningu og bryggjugjald kr. 4,20 á mælieiningu sbr. 4. og 5. gr. gjaldskrár þessarar.

Samgönguráðuneytinu, 28. janúar 1998.

Halldór Blöndal.

Jón Birgir Jónsson.

REGLUGERÐ

um ráðgjafanefnd um erfðabreyttar lífverur.

1. gr.

Gildissvið.

Reglugerð þessi gildir um starfshætti og hlutverk ráðgjafanefndar um erfðabreyttar lífverur.

Umhverfisráðherra skipar í ráðgjafanefndina í samræmi við ákvæði 6. gr. laga nr. 18/1996 um erfðabreyttar lífverur til þriggja ára í senn.

2. gr.

Hlutverk nefndarinnar.

Ráðgjafanefndin skal veita umsagnir samkvæmt lögum nr. 18/1996, um erfðabreyttar lífverur, og vera umhverfisráðherra og Hollustuvernd ríkisins til ráðgjafar varðandi þennan málaflokk.

Hlutverk nefndarinnar er:

1. Að vera umhverfisráðherra og Hollustuvernd ríkisins til ráðgjafar um framkvæmd laga nr. 18/1996 um erfðabreyttar lífverur;
2. að beita sér fyrir fræðslu um erfðabreytingar;
3. að gera tillögur til ráðherra um allt sem horfir til betri vegar í málaflokknum;
4. að vera umsagnaraðili um reglugerðir sem umhverfisráðherra setur samkvæmt ákvæðum laga nr. 18/1996 um erfðabreyttar lífverur;
5. að vera umsagnaraðili um umsóknir, sbr. 3. gr.;
6. að vera Hollustuvernd ríkisins til ráðgjafar um varnir gegn slysum sem kunna að verða vegna erfðabreyttra lífvera;
7. að vera Hollustuvernd ríkisins til ráðgjafar varðandi tilkynningar um sleppingar og markaðssetningar á erfðabreyttum lífverum á Evrópska efnahagssvæðinu eftir því sem ástæða þykir til.

3. gr.

Umsagnir.

Leita skal umsagnar ráðgjafanefndar áður en endanleg ákvörðun er tekin eða leyfi veitt fyrir afmarkaða notkun erfðabreyttra lífvera, þ.e. starfsemi B með örverur í flokki II-1, II-2 og II-3 svo og dýr og plöntur, sbr. reglugerð nr. 330/1997 um afmarkaða notkun erfðabreyttra lífvera. Hið sama gildir um umsóknir um leyfi til sleppingar eða dreifingar og markaðssetningar erfðabreyttra lífvera á Íslandi, sbr. reglugerð nr. 493/1997 um sleppingu eða dreifingu og markaðssetningu erfðabreyttra lífvera.

4. gr.

Fundir nefndarinnar.

Ráðgjafanefndin skal halda fundi svo oft sem þörf krefur, þó eigi sjaldnar en 4 sinnum á ári. Formaður nefndarinnar boðar að jafnaði til funda með einnar viku fyrirvara hið minnsta. Nefndarmenn eða Hollustuvernd ríkisins geta þó í samráði við formann óskað eftir að boðað verði til fundar telji fyrrgreindir aðilar tilefni til. Formaður stjórnar fundum.

Hollustuvernd ríkisins sér nefndinni fyrir fundaraðstöðu. Starfsmaður Hollustuverndar ríkisins er fundarritari og hefur málfrelsi og tillögurétt á fundum en ekki atkvæðisrétt. Hann undirbýr jafnframt fundi með formanni nefndarinnar.

5. gr.

Ákvarðanataka og afgreiðsla.

Hver nefndarmaður fer með eitt atkvæði á fundum. Ákvarðanataka er lögleg þegar formaður eða varaformaður og a.m.k. 4 nefndarmenn sitja fund. Verði ágreiningur um afgreiðslu mála skal einfaldur meirihluti atkvæða ráða.

Nefndin skal skila umsögn um umsóknir innan 30 daga frá því hún fær þær til umfjöllunar þegar um innlenda sleppingu eða dreifingu er að ræða, en 45 daga þegar um innlenda markaðssetningu er að ræða. Nefndin skal skila umsögn vegna afmarkaðrar notkunar erfðabreyttra lífvera, starfsemi B, innan 30 daga frá því hún fær þær til umfjöllunar.

6. gr.

Trúnaður.

Nefndarmönnum í ráðgjafanefnd um erfðabreyttar lífverur er óheimilt að greina frá trúnaðarupplýsingum sem þeir kunna að komast að vegna starfa sinna í nefndinni. Óheimilt er að greina frá umsóknum sem dregnar hafa verið til baka.

Þrátt fyrir ákvæði 1. mgr. skal ekki fara með sem trúnaðarmál upplýsingar um atriði sem varðað geta heilsu manna eða raskað umhverfinu svo og upplýsingar um aðferðir og áætlanir um eftirlit með erfðabreyttum lífverum og viðbrögð í neyðartilfellum.

Á meðan mál eru til umfjöllunar í nefndinni skulu nefndarmenn ekki gera einstaka þætti þeirra opinbera án samráðs við formann eða þann sem óskaði trúnaðar.

Trúnaðarskylda helst þótt látið sé af setu í nefndinni.

7. gr.

Upplýsingaskylda.

Nefndin skal veita Hollustuvernd ríkisins og umhverfisráðuneytinu upplýsingar um störf sín með fundargerðum og ársskýrslum.

8. gr.

Kostnaður.

Nefndin skal gera fjárhagsáætlun vegna starfa sinna fyrir hvert fjárhagsár, svo sem vegna funda, fræðslustarfsemi, gerð sérfræðialita, ferðir og einstök verkefni. Fjárhagsáætlun skal samþykkt af Hollustuvernd ríkisins.

Kostnaður vegna starfa nefndarinnar greiðist af Hollustuvernd ríkisins annar en þóknun til nefndarmanna en sá kostnaður greiðist af umhverfisráðuneytinu.

9. gr.

Gildistaka.

Reglugerð þessi er sett samkvæmt ákvæðum 6. laga nr. 18/1996, um erfðabreyttar lífverur, og öðlast þegar gildi.

Umhverfisráðuneytinu, 26. janúar 1998.

Guðmundur Bjarnason.

Ingimar Sigurðsson.

REGLUGERÐ

um breytingu á reglugerð nr. 504/1996, fyrir Lífeyrissjóðinn Framsýn.

1. gr.

Við bætist nýr kafli sem orðast svo og breytist töluröð annarra kafa og greina samkvæmt því:

23. Séreignardeild.

- 23.1. Til séreignardeildar sjóðsins er heimilt að greiða framlag sem greitt er umfram 10% af heildarlaunum sbr. 9. gr.